

**Sastanak ministara vanjskih poslova zemalja članica  
Centralnoevropske inicijative 13. juni 2012. godine u Trstu**

**Obraćanje dr. Zlatka Lagumdžije, zamjenika predsjedavajućeg Vijeća  
ministara i ministra vanjskih poslova Bosne i Hercegovine**

Gospodine predsjedavajući,  
Drage kolege,  
Dame i gospodo,

Želim da se na početku zahvalim predsjedavajućem Centralnoevropske inicijative, Ukrajini i Sekretarijatu CEI-a na uspješnoj organizaciji ovog značajnog događaja na kome se tradicionalno okupljaju najviši dužnosnici zemalja regiona Centralne i Istočne Evrope. CEI već dugi niz godina predstavlja odličan forum razmjene informacija, ideja i odgovarajuće mjesto za diskusiju o važnim regionalnim pitanjima, ali više od svega trasirala je puteve broja zemalja članica približavanja evropskim integracijskim procesima. Doista, činjenica da 18 država CEI-a uključuje zemlje članice EU predstavlja neprocjenljivu vrijednost za daljnji razvoj odnosa u regiji. Prema tome, treba pohvaliti vidljivost i rastuću važnost CEI-a koja predstavlja most koji nas spaja i omogućava nam da objedinimo naše planove, ciljeve i konkretne aktivnosti i projekte.

Danas, od 18 zemalja članica njih 9 su članice EU, a sljedeće godine, koristim ovu priliku da čestitam našim prijateljima i susjedima iz Hrvatske, biće 10. Ovo još jednom potvrđuje vrijednost ovog jedinstvenog formata koji ujedinjuje članice EU sa zemljama koje imaju strateški cilj, a to je ulazak u EU. CEI svakako igra važnu ulogu kao dobra priprema za predstojeće integracijske procese.

Gospodine predsjedavajući,

Na globalnom nivou, želio bih izraziti zadovoljstvo time što je CEI dobila status posmatrača u Generalnoj skupštini Ujedinjenih nacija.

Također smo zadovoljni činjenicom da je Memorandum o razumijevanju potpisan prije par dana između CEI-a i bečkog poslovnog foruma. Prema našem mišljenju, to otvara nove mogućnosti za zemlje članice CEI-a i još jednom potvrđuje projekat orijentiranih metoda saradnje koje su zaštitni znak CEI.

**Snažno podržavamo daljnji rad u uspostavljanju civilne društvene mreže CEI-a.**

Također, želio bih spomenuti drugu važnu dimenziju CEI-a u kojoj su postignuti izvrsni rezultati: mislim na Fond pri Evropskoj banci za obnovu i razvoj CEI-a, koji podržava i sufinansira važne projekte iz raznih oblasti u regionu Centralne i Istočne Evrope. Želim istaći činjenicu da je kroz projekte u kojima je u sufinansiranju učestvovao CEI, u periodu od 1993. do 2011. godine privučeno preko 2 milijarde eura stranih investicija. Evropska banka za obnovu i razvoj samo u tom dijelu investicionog procesa participirala je sa oko milijardu eura. Na svaki euro potrošen od strane CEI-a, strani investitori su uložili 224 od čega je Evropska banka za obnovu i razvoj uložila 110 eura. Ovo, zajedno sa „know-how“ projektima razmjene programa predstavljaju zaista impresivne rezultate.

Gospodine predsjedavajući,

Dozvolite mi da vas upoznam sa trenutnom situacijom u Bosni i Hercegovini. Nakon perioda zastoja nakon prošlogodišnjih izbora, vjerujem da smo uspjeli uvesti novu energiju i dinamiku u postizanju pune funkcionalnosti naših institucija. Apsolutni prioriteti su intenziviranje evropskih i evroatlantskih integracija i u tom smislu, Vijeće ministara BiH već preduzima značajne korake. Da bi Sporazum o stabilizaciji i pridruživanju stupio na snagu, potrebno je ispuniti još jedan uslov o kome glavne političke snage vode otvoren dijalog i uvjeren sam da smo na dobrom putu da ga ispunimo. To će stvoriti potreban ambijent za podnošenje kandidature Bosne i Hercegovine za početak pregovora sa EU. Mi smo odlučni da uložimo sve napore u cilju ispunjavanja tog cilja do kraja 2012. godine.

Dopustite mi dodati da smo svjesni da put u Evropu prolazi kroz region. Stoga, moja zemlja pridaje veliku važnost za daljnji razvoj regionalne saradnje i dobrosusjedskih odnosa. U tom kontekstu smo prisutni i aktivni na regionlanim forumima dijaloga i saradnje.

Na kraju, želim da još jednom čestitam Sekretarijatu, kao i svima nama na posmatračkom statusu u UN-u koji je dobila Centralnoevropska inicijativa, te na činjenici da se CEI uspješno etablira kao pravi most između makro-regija koji će i dalje imati značajno mjesto na mapi regionalnih inicijativa.

Hvala vam.